

Poslanička pitanja
sa XL sjednice Skupštine Unsko-sanskog kantona

Poslanik Muhamed Škrgić:

Po kojem zakonu su ljudi koji su u postupku penzionisanja izvan prava da imaju socijalno osiguranje? Po kojem su zakonu isključeni iz prava zdravstvenog osiguranja ljudi, dok su u postupku penzionisanja, što traje godinu, a i više dana zna trajati?

Poslanica Elvira Abdić Jelenović:

Samoinicijativnom odlukom Predsjedavajućeg Skupštine Unsko – sanskog kantona, poslanici u Skupštini Mirvet Beganović i Elvira Abdić Jelenović su isključeni iz procesa učešća u radu Kolegija Skupštine čime je narušen osnovni cilj Kolegija, Član 14. Poslovnika, a to je unaprijeđenje efikasnosti i usklađivanje rada. Povrijeđen je Član 15. Stavak c) kojim se Kolegij obvezuje osigurati suradnju sa klubovima naroda i klubovima političkih stranaka između njih. Sukladno Članu 19. Poslovnika o radu Skupštine, poslanici Demokratske Narodne Zajednice su formirali klub poslanika, te donijeli Poslovnik o radu kluba, o čemu je obaviješten i Kolegij Skupštine. U međuvremenu nastajali su i unutarnji sukobi u Demokratskoj Narodnoj Zajednici, koji su produkt nepoštivanja demokratske procedure propisane Statutom stranke od strane predsjednika DNZ-a, čime se grubo po svim osnovama krši Zakon o političkim partijama. Ti sukobi nisu mogli uticati na rad Kluba poslanika DNZ-a u Skupštini kantona, jer su isti svoj rad definirali sukladno Članu 19. Poslovnika o radu Skupštine i Članom 110. i 111. Statuta DNZ-a. Negirajući naša prava proizišla iz tih dokumenata grubo se krši Izborni zakon BiH i uvode nova nepisana pravila kojima se kupuje podrška pojedinaca u Skupštini kantona, što sadrži elemente krivičnog djela. Ovom inicijativom tražim od Kolegija Skupštine da obustavi daljnju diskriminaciju poslanika u Skupštini, Mirveta Beganovića i Elvire Abdić Jelenović i da u skladu sa Poslovnikom o radu Skupštine poštuje odluke Kluba poslanika DNZ-a donesene prije unutar stranačkih sukoba, uz napomenu da poslanik odgovara svom biračkom tijelu i da preuzimanjem mandata polaže zakletvu i svojim potpisom ovjerava izjavu o prihvaćanju mandata, a ne pečatom kako to u svojoj obavijesti navodi Predsjedavajući Skupštine kantona. U prilogu ovoj inicijativi dostavljam presliku citiranih članova Poslovnika Skupštine, zatim citiranih članova Statuta DNZ-a, te presliku obavijesti Predsjedavajućeg Skupštine.

Na 37. Sjednici Skupštine održanoj 11.06.2013, Skupštinska većina je usvojila Izmjene i Dopune Zakona o izvršenju budžeta kantona za 2013, kojim se javni novac dodjeljuje isključivo političkim partijama, marginalizirajući potrebe, rad i postojanje poslaničkih grupa, kategorije koja je uvrštena u Državni zakon o finansiranju političkih partija. Pod izlikom o navodnoj brizi za zastupljenost žena u politici, 10% sredstava namjenjenih radu poslaničkih grupa također je namjenjeno političkim partijama, iako je praksa na kantonu pokazala da političke partije vode računa o ženama samo u onoj mjeri u kojoj nalaže Izborni zakon BiH. Obzirom da su ove po mnogo čemu diskriminirajuće izmjene i dopune Zakona stupile na snagu 02.07.2013, postavljam pitanje: Da li je po ovom Zakonu bilo isplata političkim partijama i ako jeste kad su izvršene? Koliko kojoj političkoj partiji pripada sredstava točno po postocima naznačenim u izmjenama i dopunama zakona? Koliko su političke partije dobile sredstava iz budžeta USK-a u 2012? I kako i na koji način i koje tijelo političke partije pravdaju utrošak dodijeljenih sredstava i budžeta kantona?

Poslaničko pitanje, poslanica Mira Ljubijankić:

Ovdje kad je u pitanju Ministarstvo pravde, pitam, kad ću dobiti, odnosno Zakonodavno – pravna Komisija je već prihvatila, Kolegij je prihvatio, ali na Skupštinu ne mogu dati Inicijativu u ime SDP-a vezano za izmjenu Ustava, vezano za presudu Sejdić – Finci, dok iz Ministarstva pravde ne stigne mišljenje kojim treba pokrenuti izmjenu Ustava? Pitanje zajedničkim službama, u odgovoru stoji da su tri stana prazna. Ove druge neću vam čitati, oni su na neki način ili na sudu ili se koriste. Ta tri prazna stana, ja sam u svom prijedlogu molila da se zajednička služba i Ministarstvo za boračka pitanja dogovore o posudbi ta tri stana na korištenje najugroženijim trima porodicama, koje naravno će znati ministar za boračka pitanja, koja čekaju, plaćaju

kiriju, ne rade, nemaju odakle plaćati, a vraćaju kredit koji su uložili u izgradnju ove zgrade za borbe na Ozimicama. Tri porodice nije teško naći baš koje su socijalno ugrožene i kojima je neophodno da ta tri stana koriste dok se ta zgrada ne dovrši. Molim vas da mi dostavite odgovor da li ste taj sporazum napravili i kako ste to riješili?

Predsjedavajući Skupštine Unsko – saskog kantona, Admir Hadžipašić:

S obzirom da se ovih dana pojavila informacija da određeni broj proizvođača mlijeka na području Unsko – saskog kantona nije ostvario Federalni poticaj iz razloga što je navodno Kantonalno Ministarstvo kasnilo sa dostavom podataka u Federalno Ministarstvo poljoprivrede, zamolio bih ministra, s obzirom da nemamo potpune informacije, da nam detaljno obrazloži o čemu se tu radi? I da dobijemo kvalitetnu informaciju da li će tim ljudima koji su se žalili da im nije plaćena premija za prošlu godinu, da li će im to biti riješeno i kad i u kom vremenskom periodu? Pa bih zamolio ministra ukoliko raspolaže sa tim informacijama da nam tu informaciju danas podijeli ovdje, da odgovori. Može i usmeni odgovor na ovo poslaničko pitanje.

Poslaničko pitanje, poslanik Hajrudin Halilović:

Moje poslaničko pitanje se odnosi, iako ja to privatno naravno znam s obzirom da radim u Kantonalnoj Bolnici, ali građani pitaju mog direktora, koje su mjere poduzete u cilju sprječavanja dalje devastacije Kantonalne Bolnice, nakon požara? S obzirom da kiše padaju, da građani naravno znaju da sve ono što danas bude propalo od kiše, moramo mi lično platiti. Dakle, građani pitaju da li je dovoljno preduzeto mjera i koje su to mjere preduzete da ne dođe do dalje devastacije postojećeg objekta u Kantonalnoj Bolnici?

Poslaničko pitanje, poslanik Ismet Dolić:

Ja imam dva kratka zastupnička pitanja. Prvo se odnosi, postavljam ga Vladi, odnosno možda bi bilo bolje Kantonalnoj Skupštinskoj Službi.

Da mi provjeri kako je u drugim kantonima, naime slučajno sam saznao da je u Unsko – saskom kantonu u policiji beneficiran radni staž, što je normalno, međutim zaista nisam znao da je beneficiran radni staž ministra, ministrovog savjetnika i nekih drugih osoba? Pa me interesira zaista kakva je razlika između ministra i nekih drugih ministara koji rade također u Vladi USK-a i njihov staž nije beneficiran, a ministra policije je beneficiran? Zamolio bih Skupštinsku Službu da mi provjeri kako stoje stvari sa ministrima iz drugih kantona.

Volio bih da mi se odgovori, odnosno da mi se dostavi. Naime u Velikoj Kladaši postoji jedno gradilište iza crkve koje otvara se nedjeljom ili neradnim danom i radovi traju samo toliko za koliko je neradni dan. Čim dođe radni dan, to gradilište se zatvara i ne radi se. Šuška se da to gradilište nema dozvolu i da naravno netko suflira, odnosno sugerira da se radi u tim terminima kada inspekcija ne može da izađe na teren. Pa vas zamoljavam da dobijem odgovor na to pitanje putem kantonalne službe, a od općinskog organa uprave nadležnog za izdavanje građevinskih dozvola, da li taj objekat ima građevinsku dozvolu ili nema?

Poslanik Sulejman Kazić:

Ja imam jedno pitanje i jednu inicijativu prema ministru privrede, odnosno Kantonalnoj Direkciji za ceste. Na magistralnom putu Sanski Most – Ključ, dionica Šejkovača – Žegar, od izgradnje tog puta do sad je bio velik broj saobraćajnih nesreća i najmanje 10 smrtnih slučajeva. I ove godine desio se na žalost jedan smrtni slučaj, dijete od 15 godina je stradalo.

S obzirom da se rade planovi za iduću godinu, Federalna Direkcija radi planove za iduću godinu, molio bih ministra privrede i Kantonalnu Direkciju za ceste da aplicira sa projektom izgradnje trotoara s jedne strane ove dionice puta i izgradnjom rasvjete na toj dionici.

Prije toga bih zamolio da od Policijske Uprave u Sanskom Mostu traže izvještaj o do sad, o broju do sad saobraćajnih nesreća koje su se desile na toj dionici. Na žalost, posebno istaknuti broj saobraćajnih nesreća sa smrtnim posljedicama. Mislim da je neophodno i pored toga što je postavljen radar na toj dionici, svejedno se ne poštuju saobraćajni propisi i dešava se velik broj saobraćajnih nesreća. Pa bih zaista molio, evo ministra, da to razumije kao inicijativu i Kantonalnu Direkciju da pokrene proceduru, da se u idućoj godini ovaj problem na dionici Šejkovača – Žegar riješi.

Poslaničko pitanje, poslanik Šefik Veladžić:

Moje pitanje je isto Direkciji za ceste USK-a. Kada će početi radovi na presvlačenju asfaltnog sloja kroz naselje Bužim? S obzirom da imamo informaciju da je procedura kompletno provedena i da je odabran izvođač radova. Vrijeme prolazi, jesen dolazi, sve je lošija i lošija cesta i zaista bilo bi neophodno da to u što skorije vrijeme krene.

Poslaničko pitanje, poslanik Muhamed Dervić:

Moje pitanje, ispred prosvetara, postavljaju pitanje osobe, odnosno uposlenici čiji su roditelji umrli. Zamolio bih ministricu finansija i ministra obrazovanja da usaglase tamo spiskove i da se tim ljudima izvrši nadoknada i plaćanje u te svrhe.

Poslaničko pitanje, poslanik Jusuf Bajrektarević:

Ja upućujem prijedlog Kolegiju Skupštine i Skupštini Unsko – sanskog kantona, kao i Vladi Unsko – sanskog kantona u vidu iniciranja inicijative smanjenja troškova, ušteda. Naime, poznato je svima da se desio požar na Kantonalnoj bolnici i da mi to moramo sanirati. I treba nam i nova zgrada. I u tom smislu moramo vršiti određene uštede da bi obezbjedili sredstva za sanaciju Kantonalne bolnice, a i za druga nedostajuća sredstva.

S toga predlažem izmjenu odluke u Skupštini prvo, pa onda u Vladi i u općinama, da se ukine plaćanje komisija Skupštinskih, Kolegija, radnih tijela, da se ukine plaćanje onoga za šta ljudi imaju plaću i paušal i ta sredstva staviti u funkciju renoviranja kantonalne bolnice. Da se smanji na minimum upotreba službenih vozila i telefona, kako u kantonu tako i u općinama i da se ta sredstva takođe stave u funkciju renoviranja Kantonalne bolnice. A kada ako Bog da renoviramo, ta sredstva treba staviti u funkciju povećavanja sredstava za socijalnu zaštitu, za boračka pitanja, za poljoprivredu. I na kraju, ta nam sredstva mogu biti za otvaranje novih radnih mjesta. S toga predlažem ukidanje plaćanja komisija, radnih tijela i smanjenje službenih putovanja, telefona, u smislu ušteda, stavljanje sredstava u funkciju za ono što je potrebnije i onima kojima je potrebnije.

Poslaničko pitanje, poslanik Nermin Bećirbegović:

Interesuje me koliko se izdvaja sredstava za održavanje magistralnog puta iz općine Ključ prema Sanskom Mostu, na potezu Zgon – Vrpoljski Most? Jeste da je makadamski put, ali na moje silno razočarenje, maj, juni, juli, august, ni jednom nismo vidjeli mašine za održavanje puta, niti posipanje tog makadamskog puta. A mi koji živimo na potezu Sanskog Mosta i Ključa jako dobro znamo koliko nam je u ljetnim mjesecima važan taj makadamski put. Bez obzira što nema kategoriju magistralnog puta, ali je nemoguće da ni jednom nije se našlo načina ili sredstava da se taj put održi u onoj formi da nebi bilo onoliko rupa koliko je bilo tokom ljeta. A mi u Ključu i Sanskom Mostu znamo koliko veliki broj, da ne kažem turista, ribolovaca, dolazi na taj potez na ljetovanje, kampiranje i sve ostalo slično. Pa me interesuje koliki iznos sredstava na godišnjem nivou je za održavanje te dionice puta?